

福清縣志卷十三

人物志

居今之世志古之人以云鏡也然惟修身行道揚名於後世者列焉邑之人物道學尚矣名位勲業隨其大小而澤加於民伐銘於世君子予之若夫忠孝貞烈統繫綱常之大而名山藏業梓里標踪雖斤斤一節道藝攸屬他如羨門象教游方之外矣顧蛻塵凡圓妙覺其亦有足多者嗚呼人至此而升沉顯晦有不得爲政者矣志人物

福清縣志

卷十三

人物

道學

宋

王蘋字信伯剝上人程門高弟也寓居平江資清養粹平居恂恂退讓及語當世之務卽習從政者弗逮也紹興間守臣孫祐薦其素行高潔有憂時愛君之心召對賜進士出身除秘書省正字嘗爲上言曰人心廣大無垠萬善皆備盛德大業由此而成故欲傳堯舜禹湯文武之道擴充是心焉耳上善之官至朝奉郎楊時常曰同門後來成就無踰



吾信伯矣中書舍人朱震寶文直學士胡安國徽猷待制尹焞皆舉以自代著有論語直解著作集

祀鄉賢

林亦之字學可網山人也徙居海口之曲堆盛年挾策遊四方卒以不契去及將謁光朝齊宿與客語夜半聞息入而驚寢者光朝曰寢與人同夢乃自作遂大喜吾得師矣自此事之三十餘年光朝席下率數百人然言高第必亦之也光朝卒亦之嘆曰程氏寥寥乃有先生自六經絕筆而此爲獨

福清縣志

卷十三

道學

二

悟百年宇宙有君子者吾得而師事之百年宇宙無君子者吾不得而師事之其憾何如也而哭之如父忌則哭其墓朱熹早年過莆與光朝語喜躍忘寢食至是再過嘆莆無能爲之嗣莆推亦之嗣講席光朝之學一本于躬行言動必以禮超然不喜著書亦之戶外屢幾半于師矣或勸著書荅之詩曰講學紅泉不著書只將心學授生徒趙汝愚帥閩辟入東井書堂待以賓友之禮上其學業于朝命未下而卒所著論語考工記毛詩莊子解多

門人所述唯詩數卷及玉融志其手筆也莆中劉克莊稱其文高處過檀弓穀梁平處猶與韓並驅詩律高妙絕類唐人學者稱網山先生一曰月魚先生景定間林希逸追舉其賢贈迪功郎賜謚曰文介子簡字綺伯劉克莊少嘗師之

祀鄉賢

陳藻字元潔候官水西人而僑居于橫塘距海口不半舍初從亦之于網山又從于紅泉時陳叔盥授詩于林光朝與之讀國風于古寺吟諷累夕俄至采蘋掩卷而悟頓得中庸之旨叔盥喜告亦之而

福清縣志

卷十三

道學

三

遂以見光朝曰吾嘗語若詩不訶易不畫無悟入處而今于是尤信吾詩不亡矣乃受其拜而接之如孫藻因爲通儒遂嗣亦之講席明理究學浩然自得入則課妻子耕織出則誘生徒絙誦或拾穗而歌或舞雩而咏獨志孔顏之學學者稱樂軒先生所著有語孟莊子杜詩解并詩集景定間門人林希逸薦其賢贈迪功郎賜謚曰文遠

祀鄉賢

林希逸字肅翁號虜齋縣之漁溪人也曾祖昌言及子介皆紹興進士希逸介姪孫家去莆三舍少從

陳藻于紅泉旣而走江淮聞見益博端平之元解
試省試俱魁入太學明年成進士甲科第四人爲
平海軍節度推官以清白稱淳祐中遷秘書正字
因對乞伸言路早決大計以慰人望理宗皆開納
歷翰林權直學士兼崇正殿說書八年以直秘閣
知興化軍藻死二十年矣嘗念林陳微絕旣祀藻
于家廟又白尚書禁二墓樵採下車首誥學者自
南渡後洛學中微朱張未起以經行倡東南使知
聖賢心不在于訓詁者自莆南夫子始初疑漢儒

福清縣志

卷十三

道學

四

不達性命洛學不好文辭使知性與天道不在文
章外者自福清兩夫子始乃鏡其遺文爲三先生
集景定四年爲司農少卿舉亦之藻爲有道士乞
詔褒崇之詔謚亦之文介藻文遠俱贈迪功郎有
司樹表書謚而祀于學官春秋釋菜時之評者謂
希逸文有模範而邃理學優之文天祥稱其不戚
戚得喪而言語文章足以詔今傳後是觀于其大
者所著有易講春秋正附篇老莊列口義考工記
解竹溪十一稿行于世

祀鄉賢

明

林春字子仁號東城方成里人祖閭自福清以從戎隸泰州守禦所故又爲泰州籍家極貧嘗日中不能炊貫米于隣不得行歌自若其堅苦已如此已而受學于刺史王君某與其鄉先生王汝止兩王君故王陽明先生弟子春因此始聞致良知之學駸駸乎欲以躬踐之嘉靖戊子舉鄉試壬辰會試第一登進士第選戶部廣西司主事調禮部主客司主事又自禮部調吏部文選司主事吏部故矜

福清縣志

卷十三

道學

五

崖岬自示尊重春不以行能先人每羅致諸善類講學蒸蒸如也後爲稽勳文選郎中官益重而學益勤是時縉紳之士以講學會京師者數十人聰明解悟不乏而志行篤實則推春與吉水羅達夫羅于朋友中最沈密矣春猶疵其露才也則春之自歛可知已將病時會朋友講會子啓手足意甚愀惻聞者皆怵惕未數日遂卒生平不喜爲華詞所爲詩文皆務理道質而不艷有如其人嗚呼誠古所謂敦行君子者矣

論曰自聖人往正學微漢儒紛紛附會迄無統宗凌夷至五季晦蝕斯甚道未嘗亡顧無學以修明耳閩自唐常公衮始教以學然學猶在文未可遽以道言也宋楊龜山師程氏吾道始南嗣是宗濂洛之傳者駸駸日盛朱文公生長於閩得所私淑而道之統宗屬焉福清王蘋列程門高弟固卓然有立者維時莆有林光朝以經行倡東南蓋亦薪傳程氏先文公而得其道者也林亦之乃從之遊而嗣其講席厥後陳藻從

亦之林希逸又從陳藻一脈相承皆滙宗濂洛以其衍閩學源流不幾乎與大儒並行明則有林春以講學重京師雖有涉姚江宗旨然其恂恂然歛抑不華斯亦學務實修與世之依附新說互標榜以弋榮名者迥別故統而列之人物首焉

名臣

宋

鄭俠字介夫治平中隨父官江寧閉戶苦學王安石

每稱獎之登進士調光州司法感安石知己思欲盡忠秩滿徑入都見安石言新法不便安石不荅俠退不復見久之監安上門安石猶使其子雱來語欲辟爲檢討更命其客黎東美諭意俠正詞拒之時久不雨俠見饑民妻子流離困苦之狀因繪爲圖以進請罷新法且云如陛下行臣之言十日不雨卽斬臣以正欺君之罪詰閣門不納乃假稱密急發馬遁上之銀臺司神宗覽圖長吁數四夜寢不寐翼日蠲放新法凡十八事又下詔求言越

三日大雨執政入賀乃知出于俠也安石上章乞罷政務呂惠卿繼之盡復新法持之愈堅俠又論惠卿仍取唐魏徵姚崇宋璟李林甫盧杞傳爲兩軸題曰正直君子邪曲小人在位之臣與之暗合者各以其類復爲書以獻惠卿大怒詆俠訕謗欲置之死上謂其忠誠不深罪也乃竄英州哲宗初蘇軾孫覺表爲泉州教授元符中又再竄徽宗立赦還復故官又爲蔡京所奪歸家無所有一拂而已自號一拂居士俠性忠諤雖屢顛沛未嘗忘君

也卒後贈朝奉郎官其孫嘉正爲山陰尉寧宗嘉定六年太常博士劉靖之議謚請謚曰介祀鄉賢論曰鄭公一監門吏耳流民一疏幾挽宋室之禍當日政府大僚會有懇直如公者乎然則公之秩雖卑其忠誠之概直可與韓富輩比烈也允堪儀型百世

林旦字次中槩之子嘉祐進士熙寧中由著作佐郎歷監察御史裏行居臺五月以論李定事罷後復拜殿中侍御史甫涖職卽疏論章惇蔡確之黨又

福清縣志

卷十三

名臣

八

言呂惠卿鄧綰又在小郡乞投散地以謝天下又彈王中正石得一翟勅之徒詔並降支郡營校又論崔台符賈種民舞文深酷之罪皆逐逐出爲淮南轉運副使歷右司郎中秘書少卿太僕卿終河東轉運使子膚坐元符上書陷黨籍

黃祖舜字繼道大壤人宣和六年進士紹興中累官權刑部侍郎兼侍講進論語講義徽宗令國子監板行賜詔獎諭累論梁舜弼漢弼邦彥養孫不可加恩澤韓彥直不得升秘閣修撰楊愿陰濟秦檜

中傷舍類不宜得恩秦熈預其父檜謀議卒不宜
贈太傅皆得施行其直氣有足稱者官至同知樞
密院事卒謚莊定所著有易說國風小雅說禮記
說歷代史義及遺文十五卷

祀鄉賢

林栗字黃中一字寬夫少卽以聖賢自期篤志好學
留心經術試國子監第一登紹興壬戌進士策語
侵秦檜得下第沈沒下僚一十九年至孝宗朝以
屯田員外郎兼皇子恭王府直講時孝宗懲創紹
興權臣之弊躬攬權綱不任臣下栗言人主不患

福清縣志

卷十三

名臣

九

權在臣下要在使人持權而不以權與之收攬其
權而不必獨持之至有以鹿爲馬之語孝宗稱舍
執政有訴于上曰林栗謂臣指鹿爲馬臣實不願
與同朝出知江州旋以吏部員外郎召兼皇子慶
王府直講有旨令二王非時延講讀官相與議論
時政栗言祖宗所以輔導太子諸王唯以講經讀
史爲事若使延講官講論時政卽有博望之鑿除
右司員外郎遷太常少卿辯正太廟祫享附王之
非外補知湖州陞辭論今日天下大勢元氣雖存

邪氣尤盛引賈誼痛哭流涕爲喻忤時宰意遂以
水災論免家食八年淳熙間起直寶文閣改荆南
路安撫以春秋直解周易集解進呈詔以書藏秘
府除秘閣修撰進集英殿官至兵部侍郎享年六
十九歲贈少師謚簡肅

祀鄉賢

黃洽字德潤隆興初太學生試春官第二以觀察判
官秩滿謁丞相陳俊卿器之言于孝宗改京職累
官太常丞召對奏三事稱旨擢秘書郎除右正言
又除試御史每有論列未嘗攬撫細故累人終身

福清縣志

卷十三

名臣

十

上以爲端士會水旱因祠祭上言此事全在陛下
一心專精愛民身雖法官心則壇壝泮泮左右理
非漠然除御史中丞又言薦舉請托必競于宰執
臺諫之門若不爲人覓舉使士大夫以公道得之
豈不甚善或果有所知露章以薦亦何不可時上
方勵精求治洽言每見嘉納上謂曰卿如良金美
玉殆天以彌朕耶拜叅知政事召商榷除日洽罄
竭無所顧避上大悅曰五十年無此差除也光宗
受禪特召言事洽奏用人爲首務尋致仕卒贈金

紫光祿大夫洽常云家不欺親仕不欺君明不欺人幽不欺鬼神何用求福居官時或勸治第曰吾未有以報國而先營私乎先人敝廬足庇風雨足矣世稱其質直端重得大臣體所著有文集奏議八十五卷

陳貴誼字正甫慶元己未進士又中博學宏詞科累官太學博士時議更楮幣法貴誼轉對不合遷將作監丞憲府小學教授又奏言路雖開觸犯諱忌者爲好名切劇時政者爲玩令利害關於天下是

福清縣志

卷十三

名臣

士

非公于人心一人言之未已或至累十數人言之則又指爲朋黨忠佞不分是非易位史彌遠惡之諷言論罷理宗卽位召爲起居舍人累遷中書舍人直學士院內侍濫受恩賞貴誼輒封還詔書又屢進讜言論初政當求忠實正直奉公愛民知禮義廉恥而不越防範者以克中外之選又言成王之初元臣故老警以無逸勉以敬德期以愷梯可謂忠愛切而慮患深理宗納之紹定間上始親政以爲叅知政事而諭曰頃聞憂國之言朕所不忘

擢兼同知樞密院事嘗奏罷福清海口鎮徑港之稅邑人德而祀之卒贈少保資政殿大學士謚文

定

祀鄉賢

明

林榮字得仁湖邊人博學強記爲文援筆立就洪武初以貢入太學選入禁庭爲承勅郎謙慎齊飭一時名公卿多愛重之學士宋濂嘗曰林榮年雖少公清篤實可大用每在上左右勸上虛已納諫無殺戮太過忤旨左遷泗州知州六載理冤抑撫凋

福清縣志

卷十三

名臣

七

瘵興學勸農士民德之觀風使者薦其賢召入兵部侍郎榮曉暢軍務綜理周詳尋擢本部尚書榮狀貌魁梧美鬚巨眼每進朝奏對高廟喜曰大眼尚書來矣後因宋濂忤旨帝欲殺濂皇太子懼切救之帝不允太子赴御河時榮在側奮不顧身護之衣衫盡溼次日感風寒暴卒帝聞痛悼命工部給以棺衾遣官扶櫬歸葬贈太子少保

王克復字師仁永賓峰前人天順丁丑進士授刑部主事陞員外郎中明熟法律屢奉命按大獄有聲

遷江西叅政湖廣按察使振肅風紀不阿權貴
江西布政使時中貴尚銘怙勢黷貨克復朝覲獨
正詞不與由是名益重進右副都御史巡撫南畿
兼督漕運總攬綱維稱得大體轉南京吏部右侍
郎致仕進階資善大夫爲人質厚溫和寡言笑不
以聲氣加人確然持正君子稱其犯而不動劇而
不擾年七十八卒于家

薛廷寵字汝承福唐人嘉靖壬辰進士以行人選吏
科給事中會朝鮮以嗣位請世皇帝遣廷寵奉冊

福清縣志

卷十三

名臣

十三

往封之事竣還擢都給事中廷寵在諫垣忼慨好
直言無所忌避嘗上疏劾諸大臣皆當時用事者
有旨畱用數人時大臣以廷寵言直俱不敢辯獨
嚴尚書在禮曹新有寵輒辯廷寵復劾之世皇帝
曰嚴嵩乃朕所簡用後屢有論建世皇帝悉採納
焉銓部希嵩意欲出之外藩有言廷寵賢奈何使
去左右乃止當嚴嵩恣作威福少有言涉其身者
不令之碎首不已廷寵斥其奸回不遺餘力天子
方簡任嵩置不問然嵩踐揆席未溫亦不敢遽申

其私憾也嗚呼若廷寵者可謂嬰徑尺逆鱗而遭其唾者矣未幾卒于官貧無以斂鄉人爲治其喪廷寵事繼母李盡孝其卒也李哭之哀聞者皆隕

涕祀鄉賢

陳仕賢字邦憲玉澗人爲諸生卽以名節自勵臬司有欲俎豆所親者諷縣具牒督學詢諸生仕賢獨抗言曰始終以爲不可者陳仕賢也議遂寢登嘉靖壬辰進士授戶部主事轉杭州知府絕苞苴杜請托一切利病興革行之不避權貴巡鹽御史苛

福清縣志

卷十三

名臣

古

責屬吏仕賢白御史郡事劇請五日一謁卒無以難市舶璫橫索民物仕賢據法抗論璫爲稍戢水旱祈禱多立應杭人以爲國朝郡守治平第一遷湖廣副使廣東叅政按察司河南右布政時軍興繁費仕賢廉勤精覈餉無後期故事馬畜民間役者破產仕賢令養之官民困始蘇擢都御史巡撫湖廣先是分宐私人視師海上有要弗遂心嘆之會楚中採木急仕賢因水災疏請調停再疏寬租免役以固根本科臣頤指以耗不任事中之歸

居賑荒葬骼捐貲建學宮秋毫不干官府居官俸
八半散宗黨置祭田書田而自奉僅薄田數畝居
第蕭然頽垣也分宜敗巡按李邦珍薦諸朝命未
下而卒祀卿賢所著有四留堂存稿奏議六卷子
世良亦以孝友行誼著潛心講學所交皆知名士
邑城陷人多被掠浙帥某與中丞有舊世良貽書
奪回三百人給衣食遣歸生平慕邑先輩林元明
所學爲醵金以葬舉明經未及上卒于家

葉向高字進卿年十四縣令許夢熊大奇之爲擇婚

福清縣志

卷十三

名臣

五

送聘而酒之公堂邑人以爲盛事萬歷癸未舉進
士選庶吉士解館授編修光皇出閣講學向高訓
解明暢光皇殊喜每私告中貴曰此飛鬚先生也
萬歷三十五年以禮部尚書召入東閣與山陰朱
賡晉江李廷機同事亡何二人或去或歿神廟更
不他爰立而向高獨相者八年此時神廟官居久
中外有鬻釜之憂其大者則所嬖鄭貴妃生福王
以母故愛之甚至受封久不之國光皇日在危疑
間其他大僚空虛考選沈滯邊餉靳發礦使四出

間有傳諭外難奉行向高心血爲竭唇吻爲枯賴其慙而誠婉而明卽上讀之亦心開有時觸忤久亦爲霽而一時士大夫各立門戶向高亦屢被人言一字不辯但求退而已其大者莫如處王曰乾一事次莫大福王之國其言則莫讜于四十一年元正一䟽其餘所以調停國是挽持朝綱不遺餘力矣王曰乾者京師奸人也與孔學訟刑部訟未判突入皇城放砲進本刑部坐禁城放砲事論死曰乾急遂許奏孔學嘗受皇貴妃旨咀呪聖母皇

上擁戴福王謀害東宮從獄中具疏向通政司投遞通政司不敢達至持疏人欲自刎以脇之通政惶懼走告向高向高曰毋動遣人告大璫掌東廠者令偵邏上聞因具揭密言貴妃賢明福王賢孝萬萬保無他奸人所爲當靜處之勿介聖懷上初覽曰乾疏震怒拍案良久沈吟曰有此大事如何閣中初無一言左右乃以向高揭進上聞向高右揭卽時寬霽覽畢天顏益和宮中皆大喜幸次日向高復勸上無發此疏發則上驚聖母下怖東宮

皇貴妃與福王皆不自安唯留中勿宣布其奸徒
俟別疏批治之要以國法國體兩盡無傷而又速
定福王之國吉期以息群喙則天下恬然宗社之
幸大矣上悉聽向高言當此之時內自宮闈外及
縉紳莫不藉向高一言回天而神廟亦以此感向
高善全其父子兄弟間及福王之國有期上又遲
遲朱決向高悉爲宛轉撐柱而福王竟之國中
人情加額以爲國家之福微葉公莫能成也至萬
歷四十一年疏則言臣歷考三代以至宋元三千

餘年帝王享國四十年以上者僅十君唯殷之大
戊高宗稱爲盛治宋仁宗差治其餘皆亂周宣王
唐元宗梁武帝則始治終亂然則三千餘年間享
國長久而能克終者二三君耳萬歷之紀已四十
年天下大罷久則必弊自非嚴恭寅畏以保持之
鮮有不敗者其讜如此也至四十一年則向高在
事八年矣先後求去疏六十餘上上不得已勉從
之加少師賜坐蟒衾官護送馳驛賜路費金恩禮
備至臨行復諭留數日乃去先是癸丑會試上命

向高入兼試事有章奏令中官送闈中票擬而至是諭留數日皆異數也抵家上復遣撫按官存問存問閣臣八十始得向高時方六十又異數也向高家居上念向高屢欲再召之會有阻者罷四十八年神廟賓天光皇卽位復召向高蓋光皇在東宮時時念曰我有大恩人未報故召之亟居一月上崩熹廟卽位以光廟意起向高向高至上亦傾心向之而所保全匡救爲多久之左都御史鄒元標副都御史馮從吾以講學書院事爲兩給事所

深求上傳諭欲毀書院向高極言聖明之朝不可有道學之禁遂乞與元標從吾同去上不許最後都御史楊璉劾遂璫魏忠賢事起忠賢故望向高調護之而向高勸上放歸忠賢私第以止人言于是忠賢恨甚內竊國柄時時廷杖諸臣而向高求去決矣疏又先後六十餘上上不得已從之加恩以行是爲天啓五年其明年六十九歲卒向高坦直夷易在朝不以城府待士大夫所建言無非欲破士大夫黨比之習家居布衣徒步遇佳山水意

興勃生神韵散朗一似神仙中人仕特進光祿大夫左柱國太傅吏部尚書中極殿大學士卒崇禎初贈太師特旨謚文忠

載司空何喬遠閩書

論曰大臣之別於具臣非其名位尊崇之謂其謂進而事君必以道自伸不苟徇取悅焉爾福清碩德名卿項背相望其推誠慝以宏濟艱難本和平以調護元氣者溯厥風徽無忝鼎鉞之重至有志存悟主而瀝血丹青誼篤匡時而批鱗權倖或終阨於位莫究其施要皆偉然負公輔之望者也允宜列而著之彼進退無據貽玷身名雖赫赫焉陟臚躋華直具臣之不若焉已矣後之興起者其何去而何從

忠烈

宋

倪登字彥及場前人元符進士朝請大夫以取燕雲奉使歿于王事贈大中大夫有論語解行于世林同字子真號空齋公遇子廕官家居性忼慨好義宋幼帝南八海樞密張世傑轉圍泉州傳檄諸州

福清縣志

卷十三

名臣

九

援之同自以爲先適龍圖學士挺知杭州瑒直寶
章閣累世事宋又有劉仝祖者故爲監丞同妹夫
也謀應世傑卽同宅置忠義局宋以仝祖爲福建
招撫使景炎元年事敗仝祖出亡自經死衆勸同
避之同曰吾宅業名忠義盛服坐堂上嚙指題壁
曰生爲忠義臣死作忠義鬼草間足可活吾不苟
爲爾諸君何爲者自古皆有死兵至不屈死其爲
同妹者著于烈龔祀本邑

宋史林同作
永福誤

陳有定字國安世爲玉澗人少徙居汀之清流始業
農其爲人沈勇喜游俠至正壬辰盜起海上勢且
及汀而汀判蔡公安募吏士乘城守有定以鄉里
弟子見授黃土寨巡檢從討延邵諸山寨賊乎之
遷清流簿尋爲清流令己亥陳友諒遣其將康泰
取邵武鄧克明寇汀州有定以總管禦之戰于黃
土盡獲其部衆克明獨身逃去遷行省叅政辛丑
克明復來寇遂戰敗之遂開省于汀州遷左丞甲
辰繼開省延平遷行省平章政事悉有閩中八郡

地勝兵數萬人方國珍等來寇敗其師胡深爲明
攻有定逆戰于錦江大破執殺深閩所使大都道
絕有定歲時遣貢舶由海道取登萊約以十達三
四元主嘉之下詔慰稱有定戊申明皇帝遣將軍
胡廷美取建寧亡何將軍湯和以大兵逼延平齋
書諭降有定大會諸將殺使者取血寘酒中盟諸
將慷慨飲之誓死報元亡何明兵至夾水而陳有
定前戰不利歸會諸將乘城守勒吏士日夜擊刁
斗被甲偶立不得更番休息吏士怨甚而有定更

疑蕭院判劉守仁有貳志奪其兵守仁降士卒多
踰城走者圍十日會軍鼙局火砲聲發明兵疑有
內應急擊破之有定知事已迫乃與諸將訣曰公
等自爲計吾自死元爾坐省堂按劍仰藥飲盡叅
政文殊海牙等開門降兵入輿有定出門俄值大
雷雨復蘇其子宗海自將樂來就死并執送入京
帝詰之曰元已亡若爲誰守殺我胡將軍又不內
使者今何憊也有定恚曰已矣母多談安得加死
我乎遂并其子殺之

明

卓敬字惟恭壁江人祖客浙江瑞安縣遂籍焉幼穎
敏相者異之曰此兒骨髮必爲名卿惜血不華色
耳登洪武戊辰進士除戶科給事中時諸王多僭
擬敬乘間爲言太祖是之因以爲宗人府經歷尋
陞戶部侍郎建文初燕王來朝敬密奏王智勇超
絕且據強地宜徙封南昌以絕禍萌疏入帝大驚
翼日面對詞益聳竟猶豫不能用文皇卽位責敬
不奉迎乘輿敬厲聲不遜文皇特憐重之不卽加

福清縣志

卷十三

忠烈

三

戮以姚廣孝言卒族之敬臨刑從容嘆曰變起宗
親略無經畫敬歿有餘罪神色凜然經日如生幼
子二時有爲白嬰者匿而逃之一奔豫一還閩居

福州

鄔孟字景浩洪武初甲戌進士任四川道監察御史
清貧自守忠讜有聞在朝屢言時政竟以直諫見
殺妻王氏死之其友戶部員外郎張瑤歸其骸合

葬焉

祀鄉賢

郭應響字希聲萬程之孫萬歷丙午領鄉書第一天

啓乙丑授邠州刺史課士勸農嚴保甲練戎兵諸
矣政無弗舉已已擢刑部員外郎兩月轉戶部督
理并固糧儲兼三邊贊畫駐節蘭州條革利病修
九府圜法軍皆宿飽時有叛兵過蘭殺將札營金
城關外廼遣曹明輔入諭叛兵皆感泣立馘四克
匍匐解散蘭民始定數上封事言銳車法朝廷嘉
之遂有備兵榆林之擢道經鄜延適前道張爲賊
害于其泉人人震恐誰肯以身試禍者督撫久知
其才名強留之署應響欣然受命以鄜爲三秦咽

喉一再發擒斬賊魁無算賊雖斂跡固欲甘心鄜
矣一旦賊糾衆三千餘從間道潛入應響聞警仗
劍出署四顧無銳卒可呼乃急領家丁六七人詣
北關而賊已烏集矣獨力與抗尚手刃三賊衆寡
不敵竟以身殉事在崇禎壬申二月也事聞初贈
光祿寺丞改贈太常寺卿予祭葬廕卹有加諡忠
烈郡邑諸生合請祀鄉賢以爲名教重署邑令鄭
尚友看詳有云三寸管爲三尺鋒風雷變色三級
首喪三千膽山岳摧形昭日忠肝罄還明主干霄

義烈猶繞孤城皆死忠之實錄也所著有四書講解五經註釋管子鈎位鴻烈精詮及進呈芻言鏡車末議兵法要略多有裨于世云

載通紀

薛應齡文峰人天啓辛酉恩貢崇禎癸酉授河南鄧州州同任五載平易近民民愛服之丁丑春流寇數萬夜逼鄧城衆皆議守內城齡曰外籬旣撤內豈能保遂督丁壯力戰而死家人盡殉于河次日齡尸殞寇在河岍知爲齡皆羅拜曰錯害我薛公蓋流寇多鄧民也巡按御史劉令譽具疏言狀奉

福清縣志

卷十三

忠烈

廿

旨贈鄧州知州廕一子世襲

林塗字子野號恥齋磁窰人崇禎癸未進士授海寧知縣邑有妖人以劍術惑衆聚數千人塗捕殺之南都覆杭州不守卒乘機乞餉環署大譟塗罪爲首者而如其請以城孤不能存引去唐王以爲御史改文選員外郎募兵福寧聞王亡大慟走匿山中及魯王航海至長垣福清鄉兵請塗爲主攻城歿於陣年四十二海寧名宦邑忠義祠並崇祀同堂弟懋勉舉孝廉以節終塗子鍾爵棄青衣入山

自號逸菴懋勉子弼學該博尤善草書與鍾爵俱
隱

卓震字伯良天啓恩貢任龍南知縣博洽多聞負氣
節好談兵不隨人俯仰明亡全節死

林化熙字阿皞崇禎間貢與卓震同鄉以氣節相許
爲人端正自持獨處必正衣冠如對古人甲申全
節死

節義

宋

福清縣志

卷十三

忠烈

廿

翁績字熙載以特科爲奉議郎政和末上書言夏人

無故請和邊使趙良嗣董才來言妄生嫌隙乞斬

二人以篤信好不報遂飄然南歸老于滄洲之上

宣和初年童貫使熙河經略使劉法帥師代夏死

貫以捷聞績哭以詩曰千里寒沙遺白骨一番新

鬼哭黃雲偷生同惡終相蔽安得忠誠達聖君蔡

京當國聞此詩者皆服其直所著有天山十議

敖陶孫字器之東塘人少倜儻有大志爲文援筆立

就淳熙庚子鄉薦第一遂補八太學紹熙甲寅朱

文公在經筵本趙忠定所薦韓侂胄構之以難疏
請予祠陶孫首以詩送之趙汝愚謫死陶孫哀之
以文又揭詩于通衢云左手旋乾右轉坤云何羣
小肆流言狼胡無地容姬旦魚腹終天葬屈原一
死故知公不免孤忠賴有史長存九原若遇韓忠
獻休說渠家末代孫侂胄大怒遣捕陶孫變姓名
亡命得免侂胄死陶孫登己未進士終溫陵僉判
卒年七十四有臞庵集祀鄉賢

明

福清縣志

卷十三

節義

其

黃見泰字士必號赤石崇禎庚午舉人性狷介素以
名節自期明亡隱居村落素冠白衣以終其身嘗
曰胸結不消之冰日覩不更之日未嘗出見紛華
而悅也又自題小影云家以貧破書以貧焚唯有
青山將不去容吾看脚看浮雲以節終其年

嚴通字志吉號白海又號白漁江陰里人少孤業小
販奉母民部鄭廷楫一見異之令就學文聲大震
郡邑諸名士多與交歡以品節相砥崇禎丙子薦
於鄉癸未登進士逾年流寇破北京逼朝士汚以

職拒卽磔之通需次在京獨微服脫歸唐王亡隱
江陰小巖中侍母日縱酒吟嘯不出也會有牽誣
者被逮死於郡獄所著有白漁集藍閣逸纂春秋
箋若干卷

林琦字鏡甫崇禎丙子舉人三上公車不第乃閉戶
著論史鴻文一書凡有關名教者皆輯焉丙戌挈
妻子棲海壇之君山巨猾陳某者利島民財假名
內附實欲圖霸島中以謀要琦琦大怒罵且毆之
遂遇害時有竊其顱者及妻子持喪歸柁楫不動
福清縣志

卷十三

節義

廿

忽有島民奔告琦顱埋處掘得之歸葬焉
國朝

夏晉字志翰號椒園北隅人以貢入北雍康熙癸卯
舉順天庚戌成進士觀政逾年假歸甲寅逆藩之
變檄四出勒在籍者官之晉抗志遠遜逆窮捕不
能得威繫家屬忍弗顧也逆藩平 詔叙不污僞
命者晉得擢用謁選時年六十有七矣丁巳授諸
城縣知縣未赴任卒京邸士林惜之

陳魁字學薦號枝先玉澗人康熙丁未進士耿逆

變閩中僞遊擊迫脇縉紳助餉魁宇堅執弗從軍
士譁然奮力爭擊時得家丁衛歸遂逃匿深山不
爲僞職所污逆黨平錄用靖節士夫魁宇未及受
職而卒雍正二年督撫奏請祀忠義祠

施大晁字觀宏號擴菴平比里人登康熙癸丑進士
耿逆變亂羅致紳士徵書四出大晁抗節不受僞
職逃匿金芝山募壯士以待

王師

僞縣令某偵知匿所迫以僞檄

晁忠憤激烈嚼舌唾罵逆黨羣

毆之嘔血數升而死子鴻綸康熙乙酉解元授神

福清縣志

卷十三

節義

其

池令擢工部虞衡司主政

論曰人臣遭時坎險撫臆誓肌甘自引決彼直
所欲有甚不苟求活者耳福清如倪朝請淪歿
北庭固所稱勤其官而死者幼帝南航林劉倡
忠義計欲噓已燼之灰明知罔濟蹈險如夷元
季陳平章以奇謀制勝矢志恢復當大命已去
百折不回併其子甘心就戮可謂始終無貳者
矣若卓司徒靖難族夷郇侍御櫻鱗見殺郭兵
憲薛州牧捍戎躬殲以及林恥齋卓伯良諸賢

或以舉兵殉或以全節瞑均之死有餘芳也垂
諸史乘直可與宇壤並壽若夫義不苟容如翁
奉議輩矢詩摘奸也黃國博輩抗懷履潔也鳴
箠立仗空貽巷伯之章躍戒初潛暗灑逋人之
涕嗚呼其庶異乎忍隱自其覩然人面者已

風槩

宋

林穎字叔嘉隆興間爲博士弟子憤湯思退唱和議
率同官伏闕攻之淳熙初第進士廷策以復境土

福清縣志卷十三

風槩

廿

斥權倖爲對由安溪簿錄事累太學博士欲城唐
鄧爲沔漢藩籬屯海泗爲江淮保障出師襄蔡以
噉秦楚分兵商汝以圖陝洛條陳十二策未獻而
卒

林瑒字景長挺之子少入太學登淳熙甲辰進士第
二人教授鄂州三爲轉運幹辦秩滿有旨待掌故
執政欲挽授辭歸四年不通問執政以他屬久之
除吏部架閣嘉定初除國子正輪對言當發內帑
省掖庭裁戚畹覈貂璫及破數十贓吏家寧宗嘉

納之改國子博士請外知興化縣改知泉州改知
袁州引疾不拜寶慶初召再辭除寶章閣予祠一
何仲慈字幼齋理宗朝應薦舉判興化廉謹方正蒞
官肅若神明不畏強禦有犯法雖權貴亦不貸吏
民服之

陳景思名恪以字行西塘人官籍田令封朝請大夫
當孝宗時韓侂胄與聯姻及侂胄相寧宗排擊異
已者因禁僞學竄趙汝愚貶謫黨籍乖戾日甚是
思不以姻戚阿也從中排解規以勿爲已甚侂胄

福清縣志

卷十三

風槩

三

然之於是趙汝愚復資政殿學士黨人見在者徐
誼等十一人咸先後復官自便時朱熹沒已踰年
周必大畱正各已貶秩致仕詔熹以待制致仕必
大復少傅正復少保事載綱目可考夫景思當姻
戚薰熵時不爲所染且於僞學之禍能一言匡挽
之是不獨有以保全善類而其爲功於正學者實
多矣宜其令名不朽云

明

夏伸字允嘉臻之裔比隅人登洪武乙丑進士授石

首縣縣丞陞絳縣知縣俱有惠政戊辰八覲考最
爲天下第一賜白金五十兩寶鈔一萬貫晉刑部
員外郎戚晚常中藉皇太子妃弟虐縱不法伸抗
疏論之高廟嘉其風力特名爲都察院左都御史
掌理院事在院僅五十七日以直諫忤旨外轉廣
西按察司僉事伸尤長于藻鑑貴池許觀爲布衣
時有同寅陳敬宗與觀同里人揭觀制義以示伸
伸覽語曰此人當大魁天下異日必端方臺閣也
後觀聯捷三元歷禮部右侍郎轉侍中盡節革除
福清縣志

卷十三

風槩

三

間果符所言云

陳堅字希厚號孔亨永賓薛田人洪武戊辰進士授
河南道監察御史在臺垣論事侃直以抗疏謫桃
源縣丞風節大著

韓宏字士毅海口人永樂乙未進士授戶部主事擢
韓府長史改寧府直諫不阿王不悅誣以事被逮
檻至京江西省臣交章爲白得釋調永平府同知
以績最陞楊州府知府爲政愷悌正直滿三載郡
民赴闕奏留上許可增俸一級陞山東叅政轉浙

江左叅政累疏致仕卒年八十五

祀鄉賢

夏裕字孔裕北隅人正統壬戌進士授南京貴州道監察御史除雲南道疏陳荒政十二上納之巡按河南風節凜然後奉命輯東昌伍治廣平妖年勞著績陞雲南憲副署提學試士服輿論考定鄉賢名宦以規範來者尋陞按察使引疾歸逾年朝議起用之補貴州臬司表率僚案肅清郡邑大學士林文稱其仁足以卹下智足以懾暴有旨擢陞矣疏懇致仕歸年六十有二卒

福清縣志

卷十三

風槩

三

俞璟字景明永東里人登景泰甲戌進士初授河南道監察御史巡視河道權豪不敢犯陞山東僉事鎮守遼陽復除廣東僉事分巡嶺表宦轍所至以執法持憲稱懇乞休致卒年八十餘

戴濬字文哲東塘人膺之孫登天順庚辰進士詔求言濬條陳六事忤旨繫詔獄四載至成化改元始允所奏授戶部主事轉郎中知湖廣岳州時靖州苗寇九谿蠻猖獗肆毒濬立法漸次削平民賴以安九歲秩滿民詣闕奏留上賜誥命增俸級復任

歷十四載陞太僕寺卿濬立心正大遇事敢爲所
著有明齋集岳陽宦紀行于世

林堉字克茂域之從弟海上人登成化丙戌進士知
浙江景寧縣禁奸除暴聽訟明斷縣學草創至堉
規制始備擢監察御史巡按京畿英風凜凜人憚
之有解印而去者後爲權貴所陷宏治改元詔復
舊銜

謝天錫字廷爵號靜軒海口人登正德戊辰進士授
行人陞監察御史巡按北直隸廉慎有威衡水及

福清縣志

卷十三

風槩

三

魏縣苦洪水稅糧虛負乃爲開渠數千丈人德之
巡按廣西大有風憲卒于官著有靜軒集

祀鄉賢

陳伯諒字執之遵義里人宏治甲子鄉試第六名登
正德戊辰進士與李夢陽方豪鄭善夫謝蕢何仲
默齊名有海內十才子之譽知富陽縣調崇德抑
豪強繩奸猾廉仁兼著以最入爲監察御史多所
建白糾中官劉瑾疏三上不報中外肅然稱爲名
御史提督兩京學政秉公持衡首拔狀元楊維聰
于書生中士服其知人擢四川提學副使未上卒

中外咸惜之所著有東溟出山文稿行世祀鄉賢
子一科嘉靖甲午鄉薦令應山有治聲孫見嘉靖
丙午鄉薦倭攻福清見率家丁禦之被執與訓導
鄔忠涵俱死以義烈著稱云

方日乾字體道時和里人登嘉靖癸未進士歷御史
在臺論事侃直通達國體終山西按察司僉事子
塘領鄉薦有操尚

項志德字尚之海口人嘉靖戊子鄉薦授青田教諭
擢吏部司務歷禮部員外郎中遷四川叅議爲人

福清縣志

卷十三

風槩

廿

尚節槩重然諾平居與人語直而不阿雖諸公貴
人前不改其度嘉靖三十四年倭入寇破福清城
擄其子志德方奉表入賀萬壽聞之卽上疏乞歸
諸縉紳在京者厚有所餽卻不受或謂君固清節
持歸贖子庸何傷志德曰諸公憐我固不責報吾
奈何因難以爲利也未幾子亦歸

翁世經字可貞號一水平北上人嘉靖乙未進士授
戶部主事歷員外郎中梧州知府浙江叅政終廣
東布政世經峻潔有才在郎署著聲爲郡釐剔積

一弊繕城河甃街渠百廢俱興事集而民不擾撫臣
條爲列郡式滿三載御史奏留之郡立祠以祀爲
浙東分守抗紀功權貴料日本事情爲廣西右轄
密疏論親藩強橫皆言人所不敢言行人所不敢
行者轉廣東左轄謹權量慎出納卻進珠進葛常
規而民免重病革輸納解戶宿弊而下莫作奸直
氣震于殊俗渥恩浹于海濱甫四月而卒朝野惜
之世經居官廉節由郡守歷藩臬三宴清廉其卒
于粵同僚檢其橐僅書數卷而已文宗徐中行允

福清縣志

卷十三

風槩

卅五

郡邑諸生之請俎豆于學宮以樹風表俗焉

吳從義字思中文興里石塘人嘉靖乙未進士授行
人轉吏科給事中工科右刑科左晉都給事中從
義在諫垣值法司政紊疏請慎選錦衣鎮撫官崇
明失事詔逮諸人司寇以賄曲庇劾罷之大璫高
志安置南京旋召入從義抗言凶人之性不移不
宜召不報出爲江西叅政調四川豐城人馮懋卿
爲御史家居有所關說不得會來按蜀修恠擠之
歸從義性質直坦夷旣歸杜門課讀足跡不至官

府世以此多之

李庶字季卿海口人嘉靖辛丑進士知金華縣守正奉公抑強扶弱時有柄臣北上道出蘭溪郡邑皆往候庶曰越境矣且勞民傷財以庇吾官心切恥之竟不行上官有所過相戒毋令李金華知也甲辰乙巳兩歲大飢竭誠祈禱發廩平糶全活甚衆歷刑部郎中

祀鄉賢

魏文煊字德章號南臺平南里人嘉靖甲午鄉薦甲辰進士初任兵部郎歷任知府分守嶺西副使轉

福清縣志

卷十三

風槩

共

廣西按察使思母老上終養疏言時清而辭官人臣所不忍母病而就列人子所不爲其辭楚楚上遂允之其在蜀也龍州土官變提兵擒之黃中渠魁連害三楚調兵平之征龍州記征支羅記可考及在廣也徑浪諸賊擁衆橫行修安攘事宜練兵息之嶺西大征議可考其具經濟才如此歸家杜門屏跡耑意著述家近道山麓因述朱紫陽石室清隱志題爲石室私抄文集行世年八十有奇云莊應元字子春嘉靖癸卯舉人授吉州學正陞儀真

令值大旱民心惶惶應元釋所繫無辜者五十人
卽日大雨時有親藩喪道由儀真中貴護喪鴟張
橫索民皆驚竄不敢近應元下令曰王樞至敢有
逃匿者置之重典卽有不測吾以身當之乃躬率
百姓執干盾陽言護喪中貴知官民協心爲之奪
氣不敢擅作威福官僚行禮而去邑中晏然所過
州縣遂皆無所擾

魏體明字用晦後瀛人嘉靖乙丑進士初授吳令吳
邑劇甲諸部體明早作晏休掊擊豪強痛繩猾黠

福清縣志

卷十三

風槩

七

賦役稱便以晁擢給事中士民感戴繪吳山圖以
贈太僕歸有光爲記歷兵刑工三科條上謹天戒
慎刑獄與戎政防守所宜者又陳時政十二事及
兩廣六事上垂嘉納謂洞達而便于國時趙公炳
政議更營制于是近甸有警公疏謂輕變兵制非
祖宗法尋罷相國內監李進殺人都市劾之正法
糾恭順違命之辜勲臣股慄出爲副使備兵九江
時鄱陽彭蠡間多爲盜藪乃增戈船游徼勒兵守
要害渠率就縛又築堤疏水以爲民利尋叅山東

分守青萊調停河運得法按察雲南疏雪滯獄嘗
策擘叮喇必叛請勿受貢以絕其奸當事指爲先
見始轉滇右轄旣而遷蜀左轄凡所供採木文錦
宮扇諸物費以數萬計區畫得宜民不知疲值蜀
中丞缺朝論皆推體明竟以無援阻其歸也圖書
蕭然杜門著述沒後學使者豫章徐中行檄祀之

學宮

祀郡學鄉賢九
江府吳縣名宦

薛夢雷字汝奮薛港人隆慶辛未進士授江山令推
入爲御史以失江陵相意出爲廣東僉事歷叅議

福清縣志

卷十三

風槩

廿

破蠻賊勦亡命蘇觀陞葉宗權等所斬獲無算三
受上賞擢浙江副使雲南按察使布政使蠻阿克
者武定會也武定守失蠻心遂爲亂守逃至會城
委其印于藩司克隨以兵攻城索印自鎮臣而下
皆惴懼請于中丞姑予印以紓禍夢雷獨爭之強
吾戮力固守援兵且集賊奈我何卽不然守死正
也何計其他語憤慨激厲聞者皆色變後中丞計
逼卒予印中丞坐逮入京以夢雷爲代遂擢右副
都御史亡何言者連及夢雷奉朝命聽勘比勘枉

大白而尋卒矣夢雷有經世才敏練通達盤根錯節迎刃而解初爲江陵相國所舉士入爲御史江陵之黨有所囑弗附也遂一麾而出士論以此多之

鄭夢禎字開父隆慶庚午鄉薦授寧晉教諭徙國子監博士擢守蘄州荊府護衛地久廢爲民居惡少構王欲歸前地夢禎奏藩衛削矣責地何爲臣不敢奉令王乃止巨璫陳奉監稅楚中橫甚其爪牙虎而冠郡守以下皆伏謁夢禎獨前揖無所詘奉

福清縣志

卷十三

風槩

廿

檄來蘄包礦稅夢禎力排之又遣其黨王金吾開蘄迎山礦且求賂夢禎忿獵纓起曰吾豈重去官哉遂乞休蘄民相率詣王金吾曰州有賢守爲爾去官群毆辱之奉益怒以抗旨劾夢禎謫爲貴州按察司經歷隨遣人尾其後將甘心焉州人擁護得免夢禎守官骯髒歸不持一錢忽疽發而卒蘄民間之罷市巷哭至有數千赴吊者祀之名宦後

贈湖廣按察司僉事

祀郡學
鄉賢

陳璧字道良號瓊山萬歷丁丑進士初授歸德推官

以風裁著入爲刑禮二科給事中上疏條陳八事
又劾都御史李材僞學又請復言官罷老臣爲執
政所忌出知太平府郡民穿土得金穴獲黃白二
金以獻璧輦歸府藏悉以修城垣葺學官指無所
染廉聲大振遷廣東提學副使秉公衡文士咸仰
之尋轉湖廣叅政山東按察使所至風紀凜然在
湖廣值奸人王首仁誣親藩在山東值惡璫陳增
誣益都令衆皆觀望璧獨奮然持議不可奪尋以
右布政備兵淮陽與璫忤乞終養未幾卒璧政尚

福清縣志

卷十三

風槩

甲

嚴肅而操履耿介閩人謂與鄭方伯雲鑿可方駕

云

祀郡學
鄉賢

余夢鯉字有徵鎮東衛人爲諸生食貧而意氣不衰
第萬歷癸未進士授新建令拊循綏輯甚得民和
太學士張公邑人也數爲人言其令賢而夢鯉落
落然僅遷戶部主事司庾天津無所染指又練習
曹事部尙書甚倚之以久次晉廣東按察副使遷
叅政分部羅定所至弭盜綏氓威惠並著萬歷壬
寅歲平黎有功欽賜帑金十五兩加二品服俸轉

湖廣按察使未抵任歸家居杜門養重罕所延接
不以片刺入公門邑人輸糧于衛爲攬納所勒索
率一石而取五斗後遂改爲折色民甚便之而黠
生刁軍相挾爲奸以危語動當道必欲復舊夢鯉
家故衛人也獨抗言折色便力爲當道陳其利害
事得毋變歲省編戶數千金邑人深德之祀鄉賢
林茂槐字穉虛號樗朋清四世孫少穎異十歲邑侯
許夢熊試大奇之弱冠領壬午鄉薦登萬歷乙未
進士授粵西梧州府推官梧權稅最饒毫不染指

平府江之寇又擒流盜陳翠湖等數百人同邑林
尙吳姬亡刻玉爲主出入懷袖至蒼梧爲舟人所
害茂槐一夕冥坐見若有婦人訴冤旦遣卒捕賊
按贓得玉主訝曰此非吾邑林君物耶必渡江飽
若毒矣窮其黨得屍南亭峽內歸之于閩葉文忠
傳紀其異治最擢南吏部主事轉北禮部員外郎
中大宗伯李文節遇大典多咨焉時朝廷無事士
大夫樹黨相攻爲首者乃其同年欲羅爲助卻之
中立不倚且勸以和衷因與不合遂不得內留遷

浙江叅政以卓異晉寧太按察使南畿重地首以紀綱振肅之清積胥侵賦而歲額克汰名色冒庠而在瀾息諸核夫馬以杜加編裕兵糧以禁舉放廣積貯以賑緩急除三窩以正疆界美政不勝舉三年卒于官當事廉其清苦相率為賻助所至民哭奠之若喪所親焉茂槐為人廉辨潔白侃侃自將而能以溫克為政以節愛維風讀書嗜古尤精于字學所著有訂訛音韻字學書攷定正四書經史決疑等書以訓正學者文宗岳和聲允諸生之

福清縣志

卷十三

風槩

三

請俎豆于學宮

梧州金華寧國三府並祀名宦

林有臺字尚瓊號劍石海口人萬歷丁未進士授蕭

山知縣治民戢盜政聲大著考選湖廣道監察御

史入司白簡擢岳動山及乘驄江北攬轡澄清墨

吏望風改綬尋丁艱歸里起補京畿道御史提督

省直遼餉矢勤矢慎不遺餘力固已積勞成疾矣

上嘉懋庸晉陟大理寺寺丞強起拜命遂卒于官

生平性狷介寡言笑歷官有藁聲且鞠躬盡瘁卒

于王事請祀瞽宗洵可不愧

鄉賢錄

林汝翥字大葳號心宏萬歷丙午鄉薦授沛縣知縣以禦白蓮教功陞四川監察御史巡視北城時有曹大與郝大爭壤服毒身死曹率衆毀郝之屋而掠其財挾制官司幾成黑獄及汝翥審供出曹進傳國興等五人進因自咎曰愚璫無知其受笞刑求免叅奏翥信其無他也卽笞之十五而去次日翥往謁客忽一窮璫乘馬截之于途橫罵無已翥收而審之捏名趙應初不知卽傳國興也自願伏辜請罪翥笞亦如曹進例數日之間二璫見萬璫

福清縣志

卷十三

風槩

三

被逮已斃遂膚愬于王體乾體乾以聞閣票罰俸內傳降級彼此爭執復命廷杖翥見璟畢命克拳恐未受廷杖先隕于中涓之手因潛出都門竟入順天巡撫鄧漢處自請繫獄懇其具奏事聞仍杖之闕下削籍爲民崇禎改元群璫正法汝翥復原職歷陞廣東瓊州道致仕

載通紀

林正亨字宗謙號益謙海口人萬歷己未進士任楚湘司李湘瘠而貧藩戚擅威虐民正亨執法斃戚畹于杖下湘民賴以有生又邊餉告急民苦輸運

詳請折役全活千餘家剔蠹鋤強凜凜不稍貫獨
重獄多所平反巡方讞時輒報可釋寃滯桁楊數
十餘湘人祠而祀之自屈賈兩先生與陶公外湘
無所爲祠者于正亨僅一再見辛酉分楚闡甲子
應蜀聘所收羅皆名士乙丑奏績補儀曹戊辰擢
兵垣遂剔貪撫糾懦帥請頒芻器議紫荆關事宜
侃侃論列俱蒙溫納辛未侍經筵壬申奉命冊封
益藩癸酉典浙闡濟濟稱得人歸報命適流寇蹂
躪鳳陵上命廷臣往勘咸觀望不欲前正亨毅然

福清縣志

卷十三

風槩

四

請往烈火鑠金馳驅鳳穎壽毫太和諸區周詳諦
眎繪圖以進至動烈廟嗚咽涕零復陳四恨五要
恨初終備寇之無人而賑難民蠲賦額宥罪宗設
重臣修築備禦爲鳳要倉悉叨兪旨不踰年寇復
至鳳鳳得保餘黎者正亨之力居多嗣此轉戶科
都給事丁丑分校南宮自楚蜀浙闡凡四典厥試
亦異數已試事竣復會計天下歲額刊定成書以
杜積弊亡何丁計吏以圜獎踰式予告歸正亨賦
性剛方遇事明決于非義取予一介不入胸中地

方興建必以身先鑿河建塔爲兩鎮禔福士民德之立祠瑞巘與楚湘金頌不衰云戊子秋憂鬱成疾卒先一夕有星隕于東南大如斗

國朝

嚴宗溥字志周號如園江陰里人博綜經史蔚有文聲康熙庚辰登進士二甲二名上特褒其文字俱好選庶吉士轉編修纂修政治訓典乙酉主山西試風裁凜然是科始定官生取中額宗溥憑文錄取缺其額拔民卷以克揭榜時直聲大震部議

福清縣志

卷十二

風槩

五

以其違例也併摘闈題劾奏宗溥引咎自陳奉御批嚴宗溥不徇情面公直可嘉尋賜古文淵鑒一部以示獎勵宗溥方夙夜兢兢仰圖報効未幾遘疾天不假年莫責其用也惜哉

論曰風之發於春則和於秋則肅用各不同其在人也亦然人有得氣於春者冲融容與動物而物不震是爲風之和平若得氣於秋者倏忽颼揚颯颯乎萬物爲之披靡斯則風之肅而其槩特殊焉福清山川靈秀多產傑人故英挺奮

發者踵接而興或陟霜臺而簡搖山岳或司憲
紀而威懾豺狼或峻標操介挽頽波而不渝或
力抗暴璫羅虎口而不恤斯非剛嚴凜槩足以
廉頑立懦者歟世有依阿取容靡靡然望秋先
殞者聞諸君子之風當爽然失矣

清操

宋

蒲堯仁字彥聖乾道六年知泰和縣廉白端謹自奉
尤薄常曰吾不欲以口腹累人時出俸餘散之貧

福清縣志

卷十三

清操

四

民不爲儲積計縣署火邑人環視嘆曰得毋爲吾
大夫憂乎群出力新之不費堯仁一錢居官三年
去之日邑人賫錢帛送之一無所受龍圖學士胡
鍾贊曰所居民化所守不遷蓋實錄云

鄭格字廸民永年之孫上井人少穎悟博聞強記淳
祐中第進士歷建寧司李以介聞豪貴有強取官
地者格力爭之卒復其地景定初授廣東察推其
操彌勵所親規之曰子冰蘖凜然不知何以爲出
嶺計格曰旣能入嶺豈不能出嶺耶改知攸縣卒

子堅字德操亦以清介世其家

明

林祖字希述方成里傅巖人遷于龍江洪武丙子舉人丁丑會試中乙榜補國子監助教進侍經筵轉兵部司務奉勅賞邊有功陞吏部考功司員外永樂初政大察天下朝覲官有權貴以故人囑祖不徇其請左遷貴州銅仁府判同邑進士韓宏戴禧以詩送其行韓詩云正直一心寒鬼膽公忠兩字動天顏戴詩云仕路行最難難在權貴間知公此

福清縣志

卷十三

清操

吧

一去贏得老身閒公偕一僕到銅仁見無公署嘆曰吾始謂外遷也乃假此去我乎卽空囊徒步歸隱于隆東之田舍所著有隆東北牕稿人傳誦之有曰朝畊南晦雲暮種西疇雨夜歸北窓下課兒經與史又曰歸來兮田已蕪仰天兮呼烏烏五斗不折兮一斗可沽將誰與兮清風半榻明月孤以詩酒畊讀老其身年六十有九卒

論曰夫士處世要在秉道禔躬何論權勢公以魏科歷任銓部考功不屈志以忤權貴因是謫

官進退有據矣歸而躬畊樂道詩酒抒懷以老
令終視彼作威福者冰消瓦解寧若此翁之陶
陶哉操守之固出處之正公其有之矣舊志論
李燦字子珍大湖人正統己未進士授萬載令居官
寬猛得宜所至訟獄衰息雅重教化禮遇諸生三
年考最陞湖廣衡州府判冰蘖之操始終不渝居
無何卒于官囊橐蕭然士論歸之

何宜字行義時和里人正統戊辰進士授戶部主事
累遷兵部職方司郎中成化初疆圉多事警報沓

福清縣志

卷十三

清操

四

至宜區畫多稱旨一時卿佐極加器重有大議皆
倚以咨決遷浙江叅政轉江西左布政勵志甘貧
澹約若寒士入覲舟僅容身隨從數人日只一炊
性謹密簿書一字不輕過侍吏疆立多欲顛踣時
王克復爲叅佐書判如流恒以太織戒宜宜安之
迨卒克復爲治喪視篋中唯圖書數卷而已

郡邑鄉賢

鄭慕字師舜陸之子海口人正德辛未進士任行人
擢南京雲南道監察御史知浙江溫州府宦轍所
至以清謹聞陞湖廣按察司副使生平韋布疏食

不事華飾有古君子之風

林應禎字國興嘉靖乙酉鄉薦爲涪州知州篤實有守淡素自如鄉黨敬之

施于祥字子吉號半峰時和人嘉靖乙未進士授禮部主事歷典客祠祭二司乃以員外郎出爲江西臬僉管理湖東會信州相國用事于祥素以剛介自持執法忤權貴因補蜀僉憲所轄永寧大壩地方整飭釐然郛灌兩縣巴山岷江之水合流而下萬頃膏腴變成奔濤于祥築石堤鑄鍊牛以鎮之

福清縣志

卷十三

清操

兗

民賴其利祠祀之劍南邢主政孫以非辜誣重辟時天旱屢禱弗應忽夜夢有褒衣博帶揖而前曰爾存吾孤吾昌爾後覺而知有寃遂誠獄平反之天卽雨人以爲誠可格幽擢楚憲副單車就任簡書所命耑在湖北一帶居中鎮扼內保鄖襄外捍雲貴荆湘以北倚爲長城秩滿陞粵西大叅粵西與端州接壤盜賊滋熾粵東當事議築城于要害檄名蒼梧平樂郡民守令莫敢爭于祥持大明會典編示藩僚曰兵餉之事或取給隣省至力役之

征無相累也移闕廣州府布按二司據典條陳倡
議者氣阻因是罷役大籐等峽與柳慶以西悉爲
徑據干祥撫綏以恩懷柔以義自相讐服俛首願
受戎索真西臺一大藩屏也未幾解組乞歸干祥
歷宦清廉居家未嘗置產唯存圖書數篋遺訓其
子孫曰吾以清白傳世爾曹紹述書香吾不亡矣
四世孫起元順治己丑進士任廣東叅議能世其
家祀鄉賢

郭萬程字子長化南人早孤家貧刻意力學歲荒嘗

福清縣志

卷十三

清操

辛

負米百里外母肺疾寒無被與妻盧氏抱母而溫
以背通覽經書淹博鈎貫不以得失動心以貢上
春官嘉靖乙未成進士上荒政鄉祠社學僧田均
驛弭盜六議霍少宰嘆賞以爲通達守選三載授
徒傳經以三不朽相砥礪四方趨都下如河汾除
刑部郎訊鞫明允有奏獄干權貴諸郎逡巡不敢
治萬程疾作扶病往按其事竟輸服之尋以轉劇
將革呼年友大司徒馬森託以後事司徒撫床慰
之子有懿德當食其報萬程嘆曰德不過顏子伏

枕連呼母數聲而絕年三十二卒時囊無一錢都
諫薛廷寵爲經紀其喪云萬程爲文雄閱簡奧力
追西京遺文無多而于福清之地志山經耆舊沿
革特加詮焉篤行勵操不苟一介馬司徒稱其沈
潛希顏壁立似孟士論臆之督學徐中行爲梓子
長集而祀之學宮子造卿見文苑孫應寵癸卯舉
人有文名應響丙午第一以忠烈贈萬程太常寺
卿曾孫文祥庚辰成進士

載何喬遠閩書

薛曾字師孔前薛人嘉靖丙辰進士授中書舍人轉

福清縣志

卷十三

清操

五

兵部主事徙吏部考功員外郎吏部郎故尊貴然
自員外以下無所闕預畫諾而已曾獨諤諤諸郎
間皆日攝之其憾尤甚出爲威茂兵備勦平草坡
黑虎諸蠻鑿石洲以殺江流茂州城無崩嚙患民
多淫祠曰禹鄉也宜祀禹矣居五歲轉粵西叅藩
將吏士民送數百里皆泣下像祀之抵家卒曾在
茂州前備兵使者日費且十金一切裁罷曰毋困
邊民疏食布衣處之漠如家人有語及產業輒持
杖擊走之歸裝皆圖書諸子日稱貸爲生猶不給

云祀鄉賢

盧一誠字誠之化南人萬歷庚辰進士授行人曹局閒無所事日閉戶讀書如書生時恥逐隊向要津徼善轉也蓋十年而始晉南度支郎江右守臣移文爲南昌新建二邑請改折時邑多有貴人莫敢難一誠曰南都根本重地四方多故兵食日增虛糜庾以自弱非計力格之又三年出爲潮州守潮故饒郡一誠毫無染指上下交際踴踴然有點僚筦郡權乾沒多以其餘遺一誠一誠怒叱之臺使

福清縣志

卷十三

清操

五

知一誠廉欲併屬以權事一誠不可守奈何奪丞倅職無已則稍爲稽覈而已潮人咸稱一誠凝操峻行爲年來守郡僅見所著有四書講述十一卷學者多宗爲指南云

方懋學字壯行永賓里人萬歷癸未進士初授行人轉工部主事時上有事西山當治道雨後泥濘衆莫肯任懋學拮据營辦往來如砥工部多富商辦給上供諸費黃綠曹郎藉以自潤懋學獨謝絕不與通奸竇大塞未幾以艱歸除服至京卒囊不滿

十金非賻贈幾不能殮鄉里宦都門及稍識面者
莫不隕涕祀鄉賢

鄭元勳字景司原名元和萬歷初貢太倉州判官所
至能舉其職屢折疑獄比歸行李蕭然

國朝

薛澐字子大化南人坤之孫順治壬辰進士由檢討
出爲粵西副使陞山東叅藩駐劄登萊時劇寇于
七亂地方震動澐盡撫綏之方豫防禦之略山寇
蕩平釋無辜者以千百計以裁缺回籍卒在官十

福清縣志

卷十三

清操

五三

二年一清自持嘗鬻田廬克官費居鄉亦以介節
聞

江雲龍字允光號躍津平北里人素性剛方不隨人
俯仰康熙壬午舉於鄉選浦城學教諭浦士習頽
靡諸生每釀錢呼盧群聚學署學師因以爲利雲
龍至斥佻蕩嚴考課卻餽遺不率者輒戒飭之士
習丕變時浦令朔望謁 聖擁呼明倫堂上雲龍
曰此 先師廟非教官宅何得如是令悚然從此
輻至學門外束躬而入後卒于官囊橐蕭然融人

寓浦者相率賻之始得扶櫬歸

論曰清令德也而世或病之嘗觀易豫之初六節之上六其義皆凶而詞不同曰苦節貞凶悔亡夫節而苦非聖人所謂中也而節則聖人之所不易得也故曰貞焉悔亡焉有恥焉爾福清諸數公皆以飲冰之操矚然不滓窮約終身論其節不無過苦固聖人之所取也百世之下聞風興起有志之士益欣爲執鞭云

郭文祥舊志論

前修

福清縣志

卷十三

清操

五

宋

游寇卿字公忠東塘人宋嘉祐八年進士朝散大夫初福清儒學在縣治之東祀先聖像于三禮堂寇卿輸地建學宮爲千百年表寇文物之所邑人祀鄉賢祠以報功又特建興文祠像祀之其祠詮載學校部名同學宮不朽云

林用晟字子晟爲胡安定弟子有文名以薦假承事郎甫銓注蔡攸提舉秘書省薦以校勘力辭攸託其戚龍圖許份方之乃狎狂歸隱于巖山與諸子

講業所著經濟要覽爲左丞葉夢得嘆賞

林挺字仲成適之子早失父兄田廬蕭然刻意自勵以遺恩授監稅爲漳浦丞因母老乞養歷福建提舉司幹辦常守職爭是非不以小官有所屈知潮陽縣州符造戰艦而不給一錢挺條不便守怒譙讓遂藏符束擔欲去會詔寢其事知沅州治蠻徭以恩信而守備不廢秩滿諸臺上治行方中年力求歸病革猶曰生平無他憾獨掛冠不早耳其倦仕進如此積階奉直大夫爵開國男卒年六十有

福清縣志

卷十三

前修

五

九子三人璟瓌瑒同第進士

明

卓邦清字若泉嘉靖戊子舉於鄉計偕下第卒業太學與徐越王宗尹蔡天應徐應元輩四十餘人日升監畢卽群會博士堂辯心講志時泰和歐陽南野德是年及第羅洪先聞之咸先造訪語極相得邦清遂受學于歐陽一時翕然輔仁相勉久之就職教諭烏程教人操身敦行自爲實地外庠人士聞之踵門聽講擢東光令以艱歸服闋補新泰令

節省休養逋戶歸者二千餘家調富川令有藍司橫索屬縣金邦清無所應心銜之嘆曰二毛已侵五斗奚戀遂棄歸司徒馬森曰若泉歷任三縣謀生不給儉素以足薪水寡欲以樂日用呼童招侶弋鴻釣鯉寄情海上翱翔太清有德之士也

施觀民字于我時和人嘉靖乙丑進士戶部主事歷郎中出守常州常江南劇郡也簿書填委猾吏以爲窟穴觀民至大刷宿弊名其尤猾者庭詰之吏相顧駭服獄訟皆單詞立判尤惡刻深有富室被

福清縣志

卷十三

前修

五

誣白出之僚佐謂使君不虞嫌疑觀民嘆息以嫌冤民守不能爲首闢龍城書院拔雋異讀書其中鑿玉帶河以通風氣萬歷癸酉舉于鄉者三十餘人其最賞者爲少宗伯孫繼臯當爲弟子員時觀民奇其文許其必魁天下明年廷對果第一人服其鑒毘陵人稱施使君什一爲吏什九爲諸生師他守日晏坐堂皇治簿書猶不給安所得從事諸生間哉擢廣東副使歸卒繼臯不遠千里入閩哭其喪

葉朝榮字良時化南人應隆慶改元恩貢授九江通判主督賦潔已恤民逋賦畢登佐權關秋毫不縱免商緡無算臺使者賢之數令攝邑瑞昌城有瀆沙患爲鑿河疏其下流域得無齧彭澤城圯卽鳩工修築屹然爲江省門戶之障二邑人尸祝至今滿六載擢養利州復築城建學鑿陂塘墾田導水經畫創置皆貽民百世利暇則與諸生講說經術廸以綱常至蠻夷君長皆欵關受學州俗一新埒於中士卒之日僚屬檢其囊僅書數卷衣數襲而

福清縣志

卷十三

前修

七

已士民奔走巷哭立祠以祀朝榮生平攻苦篤學專務窮理以力行爲先而要歸于誠曰一不誠則百美莫贖矣凡四書五經及性理綱鑑點誦如流至老無一字遺忘尤精說詩自言吾說詩不在文字于治亂興衰之故燦若指掌卽一經而五經奧義俱在其中苟有用我舉此可行其言津津有味每有質問卽旁通曲譬累日夜不能窮四方士執經如雲以科名顯者甚衆司馬吳文華稱曰真古人司徒謝傑稱曰學爲醇儒仕爲循吏所著有詩

經存固四書述訓芝堂稿行于世子向高中極殿
大學士贈朝榮如其官祀鄉賢

論曰君子之守莫大於先修其身福唐先進其
蔚為名公鉅儒者上也若正已率物禔躬不失
豈不稱好修之彥乎哉夫士也苟修之於家而
壞於天子之庭固君子所羞稱耳子之論次蓋

在此不在彼云

郭文祥
舊志論

福清縣志

卷十三

前修

五

